

乾隆甘志卷之第二十四 祥異

《春秋》書災異，不書事應。漢儒作《五行傳》，後人頗議其拘。盛世多瑞，格天育物。甘省近年慶雲河清，瑞穀瑞麥，嘉祥屢見，野慶豐收，民歌樂歲，往古罕覩。志《祥異》。

唐

太宗貞觀二十三年四月，靈州河清。

高宗調露元年八月，邠、慶、寧、涇、原五州霜。

穆宗長慶元年九月，^①靈州奏黃河清，從硤口至定遠界二百五十里見底。^②

宋

至道二年十月，靈、夏、環、慶等州地震，城郭廬舍多壞。

哲宗元祐七年九月，蘭州地震。十月庚戌，朔、環州，鎮戎軍地再震。^③

元

武宗至大元年六月丁酉，隴西地震。四年三月己亥，寧夏地震裂。

仁宗延祐元年六月，^④六盤山隕霜，殺稼五百餘頃。

泰定帝泰定四年九月壬寅，寧夏地震。

致和元年七月辛酉，寧夏地震。

① [校] 元年：原作“七年”，據《唐會要》卷二九改。

② [校] 硤口：原作“陝”，據《唐會要》卷二九改。

③ 《宋史》卷六七《五行志》載，元祐七年(1092)九月己酉，蘭州、鎮戎軍、永興軍地震。十月庚戌朔，環州地再震。

④ [校] 元年六月：《元史》卷五〇《五行志》作“四年夏”。

明

成祖永樂三年，寧夏產兩岐麥數莖。

英宗正統十二年，寧夏產異馬，白色拳毛，夜行則火光見。

憲宗成化十八年，寧夏白鼠晝遊。

二十年，寧夏猪生子如象，羊生一羔八足。

世宗嘉靖元年夏，寧夏地震，有聲如雷。

八年，飛蝗蔽天，臨洮、莊浪、固原、秦州、清水、秦安、禮縣俱大饑。

四十年，寧夏、固原地震裂，逾月乃止。

神宗萬曆三十六年八月，寧夏地震。

熹宗天啓元年正月初一日夜半，寧夏地震如雷。初九日又震。二年九月，隆德、崇信、鎮原、靜寧、真寧地大震。

〔毅宗崇禎〕十年七月，寧夏、平涼大旱，蝗飛蔽天，禾穀立盡。

十五年四月，靈州、鎮原、莊浪等處田鼠食禾，幾盡。

皇清

順治二年春，太白經天見秦分，廣武營等堡麥秀兩岐。

康熙九年，寧夏黃河水溢，淹靈州南關居民。

二十三年三月，寧夏天鼓鳴於西南。

二十六年六月，寧夏地震。

三十三年，靈州民王邦彥妻一產四男。

三十四年六月，西寧、寧夏大雨，水溢。

四十二年，寧夏老民莫進忠年一百二歲。

四十七年，靈州井中龍見古浪。

四十八年九月十二日，涼州、西寧、固原、寧夏等處地震。

五十四年，臨洮、靖遠、固原旱，華亭縣稔。

五十六年四月，固原州、安寧堡等處黃河清。

五十七年五月二十一日，臨洮、鞏昌、秦州、平涼、慶陽、寧夏等處地震。

五十八年，崇信、隆德旱。

雍正二年，臨洮衛老民周隨安、鹽茶廳老民張友並年一百歲。

八年六月，寧夏麥秀雙岐。壬寅，河州慶雲見，歷午、未、申三時。七月壬申，河州積石關上下，黃河清三日，凡百八十里。是歲大有年，寧夏產瑞穀，一莖九穗。

九年七月，固原鹽茶廳民吳丕妻史氏一產三男。

【補】^①

唐

〔太宗貞觀〕十八年，廣武縣民李來婢產一卵。

二十年秋九月辛亥，靈州地震，有聲如雷。

明皇開元時，黃河水溢，逼會州城。

二年春正月，原州獻肉角羊。

〔穆宗長慶元年〕秋九月，靈州河清。冬，廣武縣無雪。

宣宗大中三年冬十月辛巳，河西、靈武、鹽、夏等州地震，壞廬舍，壓死數千人。

七年秋九月，靈州奏黃河清。

宋

乾德元年夏六月，廣武縣蝗。二年，靈州旱。

太宗太平興國三年，靈州獻官馬駒，足有二距。

是年（雍熙二年），靈州芝草生，知州侯公贊刻木爲狀來獻。

〔大中祥符〕二年，趙德明出侵回鶻，恒星晝見，懼而還。

〔三年〕冬十月，靈武地震，壞廬舍，壓人甚多。十二月，夏州饑，趙德明表求粟百萬賑濟。王旦曰：“詔德明：已敕有司具粟百萬，其遣衆來取。”德明得詔，慚曰：“朝廷有人。”遂止。

康定元年，龐籍言，夏州鼠食稼，且旱。

〔高宗紹興十一年〕秋九月，夏國饑。

十三年春二月，夏國地震，踰月不止。地裂湧泉出黑沙，歲大饑。

十四年，彗星見夏國坤宮，五十餘日而滅。

十五年夏六月乙亥朔，日食在東井。

紹興中，夏大德五年，^②靈芝生于後堂高守忠家，乾順作《靈芝歌》，^③俾中書相王仁宗和之。

元

〔武宗四年〕閏七月甲子，寧夏地復震。

〔泰定帝泰定二年〕冬十月，寧夏鳴沙州大雨水。

〔三年〕冬十二月丁亥，寧夏路地震，聲如雷，發自西北，連震者三。

〔四年〕九月壬寅，寧夏地震。

〔致和元年秋七月〕辛酉朔，寧夏地震。

① 據《宣統甘肅通志》卷二《天文志·附祥異》補。

② 〔校〕五年：原作“九年”，《宋史》卷四八六《夏國傳》載，《靈芝歌》作於紹興九年（1139），即西夏崇宗趙乾順大德五年。據改。

③ 〔校〕靈芝歌：原作“靈芝頌”，據《宋史》卷四八六《夏國傳》改。

明

〔太祖洪武二年〕寧夏指揮徐杲出兵河套，^①地名梧桐樹。

〔十一年〕夏四月乙巳，寧夏地震，壞城垣。丁卯，夜風雨，兜鍪旗槊皆有火光。^②

又洪武初，寧夏都督馬鑑宅所畜兔鵲忽生一卵。

成祖永樂元年冬十一月甲午，寧夏地震。

永樂中，寧夏金波湖內生合歡蓮一。^③

十三年，寧夏中護衛卒胡鑿兒妻一產三男。^④

宣德間，寧夏有玄兔二、^⑤白黃鼠一，^⑥太監海壽購而獻之。

〔英宗正統〕二年，真寧縣自夏至秋大雨雹。

十三年秋七月，寧夏大水。

〔憲宗成化二十一年〕閏四月癸未，鞏昌、固原及蘭州、洮岷等處地俱震。

二十二年，寧夏衛學生胡連家黑豕變白。

〔孝宗弘治〕六年春三月，寧夏地震，連三年，共二十震。

七年，隆德、莊浪等處大饑。

八年春三月己亥，寧夏地震十二次，有聲如雷，傾邊牆，屋宇傷人。

十年春正月壬子，有星大如斗，色黃，白光長三十餘丈。一小星隨之隕于寧夏西北隅，天鳴如雷者數聲。是年，慶陽旱，寧夏、靈州、鎮番等處地震。

〔武宗正德元年冬十二月〕庚午，有星如椀隕寧夏中衛空中，有紅光大二畝。是年，寧夏左屯衛紅氣亘天，既而火作，城樓臺堡俱盡。

二年夏六月，固原河漲，平地水高四尺，人畜溺死。八月己亥，寧夏有大星南流而墜，^⑦赤光闊三尺長五丈。

是年(世宗嘉靖六年)，總督王瓊奏固原甘露降。

是年(十三年)，隆德、莊浪星隕如火。

二十一年秋九月甲戌，固原、寧夏、洮州同日地震。

十二月丁巳，鞏昌、固原地震。

三十九年秋，隕霜三日，自固原至涇州，殺禾。

〔四十年〕夏六月，寧夏、固原、莊浪等處地大震，城垣、墩臺、屋宇皆摧，地湧黑黃沙水，壓死軍民無算，踰月乃止。

① [校] 徐杲：《弘治寧志》卷二、《嘉靖寧志》卷二《寧夏總鎮·祥異》、《寧夏府志》卷二二《祥異》均作“徐杲廡”。

② [校] 旗：此字原脫，據《明史》卷三〇《五行志》補。

③ 《正統寧志》卷下《題詠》載凝真《戊戌歲金波湖合歡蓮》詩一首。“戊戌”，永樂十六年(1418)。

④ [校] 胡鑿兒：原作“魏定兒”，《正統寧志》卷上、《弘治寧志》卷二、《嘉靖寧志》卷二《祥異》均作“位定兒”，《康熙陝志》卷三〇《祥異》作“伍定兒”。據《明太宗實錄》卷一六一“永樂十三年二月辛卯”條改。

⑤ [校] 玄兔：原避清聖祖玄燁諱改作“元兔”，據《弘治寧志》卷二、《嘉靖寧志》卷二《寧夏總鎮·祥異》、《朔方新志》卷三《祥異》回改。

⑥ [校] 白黃鼠：“黃”字原脫，據《弘治寧志》卷二、《嘉靖寧志》卷二《寧夏總鎮·祥異》、《朔方新志》卷三《祥異》補。

⑦ [校] 南流：《明史》卷二七《天文志》作“自正南流西南”。

四十一年春正月丙申，寧夏地震，傾邊牆。

〔穆宗隆慶〕二年春三月甲寅，陝西慶陽、寧夏等處地震，寧遠城崩。夏四月癸未，寧夏地又震。乙酉，平慶地又震。

神宗萬曆七年秋七月，寧夏大水，河決唐、漢二壩。

二十六年春正月丁亥朔，寧夏地震。

〔三十六年〕秋八月，寧夏中衛等處地震。

三十七年，隆德、靈臺大疫，大饑。

〔熹宗天啓元年〕冬十二月戊辰，寧夏石空寺地震，礮山石，殿傾倒，壓死僧人。是年，寧夏風霾大作，^①墜灰片如瓜子，紛紛不絕，踰時而止。日將沉，作紅黃色，外如炊煙，垂罩畝許，日光所射如火焰，焰夜分乃沒。

〔二年〕九月甲寅，平涼、隆德、靜寧、崇信、鎮原、真寧等處，鎮戎、平虜諸所地震，如翻壞城垣七千九百餘丈，屋宇萬一千八百餘區，壓死男婦二千餘口。

三年秋九月甲寅，固原星隕如雨。

四年春正月癸未，日赤無光，有黑子二三蕩于旁，漸至百許，凡四日。二月壬子，日淡黃無光。癸丑，黑日摩盪日旁。夏四月癸酉，日中黑氣摩盪。

七年，寧夏各衛營屯堡自正月己巳至二月己亥，^②地凡百餘震，大如雷，小如鼓，城垣、房屋、邊牆、墩臺悉圯。五色氣見于伏羌縣鼉山之麓，自未至申而散。夏大雨雹，大者如拳。

〔毅宗崇禎七年冬，〕寧夏鼠十餘萬銜尾食苗。

清

是年（康熙十六年），固原大稔。

〔二十六年〕六月，寧夏地震。

〔三十四年〕秋八月初旬，中衛隕霜殺草，禾俱槁。

〔雍正十一年〕閏十月，寧夏霜花雪縉四十餘日。

是年（乾隆元年），固原大稔。

〔三年〕冬十一月，靖遠、慶陽、寧夏地震，平羅北新渠、寶豐，中衛香山等處尤甚。一時地如奮躍，土皆墳起，斥裂數尺或盈丈，水湧溢，其氣皆熱，村堡、城垣、隄壩、屋舍、窑莊盡倒，壓斃官民男婦五萬餘人。閱十餘日，土人有掘窑搜物者，洞開而人猶生，自云：“探盆中粟，嚼之得不死。”

十四年春二月，中衛田蛙化鼠遍地生，至夏傷禾，歷秋冬彌野皆是。其先，人家所畜貓犬捕食之，後貓與鼠戲，不復捕。鄉人每掘一窟，鼠多至數十，有尚半蛙形者，次年春始滅。

〔二十二年〕五月初七日，中衛近城田禾亦被傷，雹有大如胡桃、雞子者。

三十二年，通渭大稔，白鹿遊於固原。

① [校] 大作：原作“大如”，據《明史》卷三〇《五行志》改。

② [校] 正月：此二字原本漫漶不清，據《寧夏府志》卷二《祥異》補。

三十五年秋七月，日暮時，靖遠縣及撻喇赤堡西北天赤直貫天心，中有白氣如椽林，林至曉乃沒。

〔嘉慶〕三年，固原、通渭大稔。

〔道光〕十七年，皋蘭、狄道等處夏旱，中衛宣和堡麥秀兩歧。

是年（十八年），固原大稔。

〔咸豐二年〕夏四月初八日，中衛地大震，轟轟如雷者三次，地裂房倒，湧出黑沙泥，壓傷男婦數百口。自是震動無常，月餘始息。

三年春三月十六日午後，中衛西北有黃、黑氣二道，忽起忽落。有頃，黃氣消滅，黑氣直衝天際，向東南飛奔二三里許，即時黑暗，對面不相見，雖燃燈燭，光彩盡蔽。久之，黑轉紅，微能分辨物色，然房舍人物盡似血染。旋即狂風大作，沙礫飛揚，入夜漸息。十八日，靈州晝晦，咫尺不見人，越翼日始明。

八年春三月十五日，固原晝晦，至翼午始明。

是年（同治四年），皋蘭、靖遠、西寧大饑。固原山崩。

是年（七年），自秋經冬，皋蘭、靖遠大疫，死者甚衆。平涼、靜寧、莊浪、固原、靈臺、鞏、秦屬及永昌等處大旱，饑。

八年夏六月，陝回大隊西行，窺伺中衛城，百姓巡防，各執刀矛，立於垛口。十九日夜，所執刀矛遍生火光，高尺餘，遠望皆然，而執持之人不覺。回匪由是遠遁。九月，靈州桃李華。冬，惠安堡民人惠澤之妻孕三歲不產，忽小腹潰裂，子從孔出，如人形。頃之，子死，腹復合無痕。

〔十二年夏五月〕初六日午時，^①固原雷雨大風，至申時始晴。城西南隅有回寺一座，其門扉殿壁片瓦無存，土人謂此寺已飛入滇山、洱海間矣。

〔光緒三年〕，靈州蝗飛蔽天。莊浪、階、成、靈州等處及鞏、秦屬大旱，饑。

是年（八年），彗星見於固原東北、靈臺東方。

〔十六年〕秋八月十五日，固原大風拔樹。

〔十八年〕夏四月，化平廳隕霜。秋七月夜，靜寧東北、靈州西南星隕如雨。

十九年春正月，靈州東門外井中青龍見，報官作清醮。浹旬霹靂一聲，天上黑雲如蓋，一巨龍夭矯其中，移時始滅。

〔二十年〕六月，靈州東南無雲而雷。冬，海城縣沙雞過。

〔二十一年春〕二月，彗星出海城縣正北，月餘始沒。

二十二年春正月，靈州城內東北井中黃龍見，盧參將合設醮。半月，天忽雨，霹靂一聲，騰空而去。

二十五年夏五月，化平廳雨雹。初五日，海城縣雨雹大如雞卵，南山一帶牛羊死者一千有餘。

① [校] 正月：《宣統固志》卷十一《軼事志·祥異》作“五月”。

〔三十年〕夏六月初間狄道、慶雲見彗星出海城縣正東，二十餘日始滅。八月十二日，海城縣西北角天鼓鳴。

〔三十一年冬十月〕十六日申刻，靈州一星大如斗，從東方起，落於正西，其聲如雷，落後光芒衝入天中，其形蜿蜒，越時始滅。

〔三十二年〕四月，化平廳隕霜。五月驟雨，有龍騰於固原西海子。十月，固原白晝見大星，隨日以行。十一月十六日晝間，中衛有大星由南方出，隕於北方，紅光蜿蜒者時許，漸變青白光散。

〔三十四年〕四月初一日，皋蘭、狄道、河州、靜寧、固原、海城等處大風雪，傷果花麥苗。未申刻，丹噶爾淒風大作，冷如嚴冬，天色正黃，日光淡白，山川黯晦，田禾枯數寸許。

乾隆甘肅通志卷之第二十五 陵墓

甘肅邊陲，原非都會。郡邑舊乘，義、黃二陵，實屬傳疑，不敢附會。若夫名臣碩輔、志士賢人，冠劍所藏，寢園可問。豐碑古碣，憑弔遺踪，起敬思哀，表章崇護。禁樵置守，司牧之責。志《陵墓》。

漢

王符墓，在鎮原縣北二里。

劉表墓，在固原州西。^①《寰宇記》：^②按《從征記》云，劉表冢在高平郡，表子琮擣四方珍香數十石著棺中。晉永嘉中，郡人衛熙發其墓，見表貌如生，香聞數十里，懼不敢犯。

宋

忠州防禦使姚兕墓，在隆德縣西北三十里，有碑，弟姚貴墓附焉。

西夏李氏墓，在寧朔縣賀蘭山下，數塚皆繼遷等墓。

明

崇信知縣龐瑜墓，瑜明末殉難，贈固原州知州，遺塚在武康王廟前。

慶王墓：靖王、康王、懷王、莊王、恭王、定王、惠王、端王、憲王九王，端和世子，並慶藩分封之真寧、安化、弘農、^③豐林、壽陽、延川、華陰諸王墓，俱在靈州之韋州堡蠡山上。

安塞王墓，在寧朔縣賀蘭山乾溝口。安塞亦慶藩分封者。

總兵張泰墓，在寧夏縣東十里。

① 此襲《大清一統志》卷二〇二所載，固原並無劉表墓。參見《宣統固志》卷二《地輿志·塚墓》。

② 參見《太平寰宇記》卷三三《關西道九·原州》。

③ [校]弘農：原避清高宗弘曆諱改作“宏農”，據《明史》卷一〇二《諸王世表》回改。下同。

國朝

勇略將軍、雲貴總督趙良棟墓，在寧夏城東張鎮堡渠東之原。

【補】^①

明

寧夏廳邱希孔墓，在府城鎮遠門外，崇禎末守城靖難，姪子賢，並殉節，有碑記。

經略馬世龍墓，在寧夏府東蝗蟲廟。

三忠墓，在寧夏府城東蝗蟲廟，^②馬世龍子負圖、呈圓、獻圖俱從葬於此。

清

督兵大臣墓，在固原州南蒿店北六里許老楊溝。相傳順治初，某大臣督兵使北庭，沒而葬之。光緒中，有新疆城守尉過此，猶泣奠一次，惜姓氏未詳。

提督王能愛墓，在固原州南十里墩。

光祿大夫謝某墓，在固原州東鄉。

提督豆斌墓，在固原州北郊六里。

懷遠將軍錢某墓，在固原州西郊。^③

驍騎將軍張某墓，在固原州南郊。^④

榮祿大夫崔某墓，在固原州西郊。^⑤

提督董福祥墓，在固原州南十里墩官山。

提督張俊墓，在固原州毛曲井。

提督虎拜俊墓，在海城縣李旺堡南二里。^⑥

提督劉芳名墓，在寧夏城東南十三里。

左副都御史謝王寵墓，在寧夏縣。^⑦

提督陳福墓，在寧夏城東十五里。

鹽運使俞登淵墓，在平羅縣。

① 據《宣統廿志》卷十三《輿地志·附陵墓》補。

② [校] 寧夏府城東蝗蟲廟：《寧夏府志》卷四《風俗·陵墓附》作“漢渠東岸”。

③ 《宣統固志》卷二《地輿志·塚墓》載，雍正六年(1728)立石。

④ 《宣統固志》卷二《地輿志·塚墓》載，乾隆十二年(1747)立石。

⑤ 《宣統固志》卷二《地輿志·塚墓》載，乾隆十三年(1748)立石。

⑥ 《海城縣志》卷六《古蹟志·陵墓》載，康熙二十年(1681)年七月立碑。

⑦ 寧夏鹽池縣文管所藏《清通議大夫謝觀齋(謝王寵)墓誌銘》一通，圖版及釋文參見銀川美術館編《寧夏歷代碑刻集》第151—154頁。

乾隆甘肅通志卷之第二十六 封爵

歷代分封，因革不一，皆以篤本支、報有功也。魏析五等之爵，隋減三等之制。開國品爵肇於唐時，加封實邑詳於宋代。越元與明，具有定制。其在甘肅各郡者，載在史冊，輯錄如左。志《封爵》。

東漢

定遠侯班超，平陵人。武帝時使西域爲都護，以安集諸國納質內屬功封。按：靈州有定遠城。舊志云：“唐郭元振置，漢時未有也。”

三國魏

鶡觚男傅玄，北地泥陽人，以典農校尉稱職封。

明

慶靖王朱櫨，^①太祖第十六子。^②洪武二十四年封慶陽，二十六年徙韋州，^③建文三年徙寧夏。正統三年薨，謚曰靖。子秩燦嗣，薨，謚曰康。子邃壘嗣，薨，謚曰懷。無子，弟邃塤以岐陽王紹封，薨，謚曰莊。子寘鋐嗣，^④薨，謚曰恭。子台泓嗣，^⑤有罪，降爲庶人，薨，復王爵，謚曰定。子端和世子，未封薨，無子，弟肅枋以桐鄉王紹封，薨，謚曰惠。子倪燦嗣，薨，謚曰端。子仲域嗣，薨，謚曰憲。子帥鉉嗣。明末國絕。

① [校] 朱櫨：原作“栢”，據《慶王壙志》、《明史》卷一〇〇、卷一〇二《諸王世表》、卷一一七《慶王櫨傳》改。下同。

② [校] 十六：此同《明史》卷一〇〇、卷一〇二《諸王世表》、卷一一七《慶王櫨傳》，《慶王壙志》作“十五”。

③ [校] 二十六：原作“二十五”，據《慶王壙志》、《明史》卷一〇二《諸王世表》改。

④ [校] 寘鋐：原作“真鋐”，據《明史》卷一一七《慶王櫨傳》改。

⑤ [校] 台泓：原作“台泓”，據《明史》卷一一七《慶王櫨傳》改。

真寧莊惠王朱秩燊，^①靖王第三子，薨，子康簡王嗣。薨，子溫穆王嗣。薨，子榮僖王嗣。薨，子安惠王嗣。薨，子恭簡王嗣，無子。

安化惠懿王朱秩烜，靖王第四子，薨，子恭和王未封薨。

【補】^②

固原王璟渭，端王庶八子，萬曆二十年封，薨，無子，除。

〔慶靖王朱櫨〕子秩燊，四年襲封。成化五年薨，謚曰康。子遂壘初封平原王，成化七年襲封，十五年薨，謚曰懷。無子，庶弟遂塤以岐陽王，十七年紹封，弘治四年薨，謚曰莊。子寅鏊初封洛交王，弘治七年襲封，十一年薨，謚曰恭。子台滋，十六年襲封，後有罪，降爲庶人，嘉靖三十年卒，追復王，謚曰定。子端和世子，未封薨，無子。弟肅枋，嘉靖二十年以桐鄉王改封世子，三十一年紹封，萬曆二年薨，謚曰惠。子倪燠，嘉靖三十七年封世子，萬曆五年襲封，十六年薨，謚曰端。子伸域初封綏德王，萬曆十九年襲封，本年薨，謚曰憲。子帥鐸，二十三年襲封。薨，子倬淮，萬曆四十五年封世子，既而襲封。明末國絕。

真寧莊惠王朱秩燊，靖王庶三子，景泰六年封，成化三年薨。子康簡王遂塤，天順元年襲封，成化十二年薨。子溫穆王寅鏊，弘治三年襲封，成化十五年薨。子榮僖王台滋，正德元年襲封，十年薨。子安惠王肅枋，十六年襲封，嘉靖三十一年薨。子恭簡王倪安，嘉靖三十三年襲封，萬曆五年薨，無子，除。

安化惠懿王朱秩烜，靖王庶四子，永樂十九年封，弘治十五年薨。子遂塤初封鎮國將軍，天順八年卒。以子寅鏊襲封，追封王，謚恭和。

鎮原王朱伸垣，端王庶二子。萬曆元年封，天啓五年薨。子帥鐸，萬曆二十四年封，長子天啓五年襲封。

① [校] 秩燊：原同《明太宗實錄》卷二三六、《明史》卷一〇二《諸王世表》作“秩榮”，據《慶王壘志》、《明太宗實錄》卷一四〇、《弘治寧志》卷一、《嘉靖寧志》卷一《寧夏總志·藩封》改。下同。

② 據《宣統甘志》卷二五《建置志·歷代封爵》補。

乾隆甘志卷之第二十七 職官

歷代官制

元河州路、脫思麻路，及鞏昌、平涼、臨洮、慶陽四府，並隸陝西行中書省及陝西漢中道肅政廉訪司，又置甘肅行中書省、河西隴北道肅政廉訪司以統，甘州、永昌、肅州、沙州、亦集乃、寧夏府六路，山丹、西寧二州。

每路置達魯花赤一員，總管一員，同知、治中、判官各一員。下路不置治；中上路推官三員；下路推官一員，經歷一員，知事一員或二員，照磨兼承發架閣一員。每府置達魯花赤一員，知府或府尹一員，同知、通判、推官一員，知事一員，提控案牘一員。

明置總制一員。

甘肅、寧夏巡撫各一員。

臨洮、甘肅、寧夏糧儲郎中各一員。

分巡關西道、隴右道、西寧道、臨洮道、固原道、洮岷道、靖遠道、莊浪道、肅州道、寧夏河西道、寧夏河東道，撫治西寧道各一員。

知府：平涼、慶陽、臨洮、鞏昌各一員。

同知：臨洮、鞏昌各三員，平涼、慶陽、涼州各一員，寧夏鎮帶平涼府銜一員，慶陽府銜四員。

通判：平涼、慶陽、臨洮、鞏昌各一員，寧夏帶平涼銜一員。

驛丞：府各一員，寧州、固原州、靜寧州、涇州、徽州、階州、蘭州、河州各一員，縣則平涼、華亭、鎮原、隆德、安化、合水、環縣、渭源、金縣、漳縣、安定、會寧、兩當、文縣各一員。餘州縣無。

巡檢：涇州、蘭州、河州、徽州、階州、華亭、鎮原、安化、合水、環縣、真寧、狄道、渭源、安定、會寧、成縣、秦安、禮縣各一員。餘州縣無。

大使：平涼、華亭、隆德、環縣、狄道、渭源、金縣、隴西、漳縣、安定、會寧、禮縣各一員。餘縣無。

固原衛：指揮二十員，^①千戶一十九員，百戶三十三員，鎮撫一員，經歷、知事、大使各

^① [校] 二十員：《嘉靖陝志》卷三七《政事一·職官》作“二十九員”。

一員。

寧夏鎮：總兵、副總兵各一員，遊擊一員，都指揮三員，指揮六十九員，千戶八十六員，百戶二百五十五員，鎮撫八員，經歷五員，知事一員，教授一員，訓導二員，稅課、倉大使、副使各一員。^①

靈州所：參將一員，指揮六員，千戶十二員，百戶三十六員，鎮撫一員，吏目一員，學正一員，巡檢、倉大使各一員。

中衛：參將一員，指揮二十員，千戶二十九員，鎮撫三員，經歷一員，教授、訓導各一員，大使一員。^②

後衛：參將一員，指揮五員，千戶十三員，百戶三十員，鎮撫四員，經歷、知事、倉大使各一員。

興武營：協副一員，千戶三員，百戶三十員，^③鎮撫一員，^④吏目、倉大使各一員。

韋州羣牧所：千戶二員，百戶四員，鎮撫一員，吏目、倉大使各一員。^⑤

鳴沙州城：協副一員，指揮一員，千戶、百戶各一員，大使一員。

職官

秦

蒙恬，內史。

漢

衛青，以車騎將軍擊匈奴。

杜延年，北地太守。

谷永，北地太守。

夏育，北地太守。

皇甫嵩，北地太守。

① [校] 副使各一員：《康熙陝志》卷十七《政事一·職官》同，《嘉靖陝志》卷三七《政事一·職官》作“副使四員”。

② [校] 大使：《康熙陝志》卷十七《政事一·職官》同，《嘉靖陝志》卷三七《政事一·職官》作“倉大使”。

③ [校] 三十員：《康熙陝志》卷十七《政事一·職官》同，《嘉靖陝志》卷三七《政事一·職官》作“十員”。

④ [校] 一員：《康熙陝志》卷十七《政事一·職官》同，《嘉靖陝志》卷三七《政事一·職官》作“二員”。

⑤ 《嘉靖陝志》卷三七《政事一·職官》載，韋州羣牧千戶所有驛丞一員，《康熙陝志》卷十七《政事一·職官》亦不載。

魏

李遠，都督、原州刺史。

李賢，原州刺史，又爲周河州總管。

李穆，原州刺史，又爲周原州總管。

隋

元褒，原州總管。

獨孤楷，原州總管。

李充，朔方總管。

段文振，靈州總管。

趙軌，原州總管司馬。

唐

李道宗，靈州都督。

李勣，朔方道行軍總管。

王方翼，夏州都督。

魏元忠，靈武道行軍大總管。

郭元振，朔方軍大總管。

張仁愿，朔方軍總管。

路嗣恭，^①朔方節度留後。

張說，朔方節度大使。

王峻，朔方節度大使。

牛仙客，^②朔方行軍大總管。

李光弼，朔方節度使。

郭子儀，朔方河中節度使、副元帥。

周寶，涇原節度使。

李聽，靈鹽節度使。

裴識，靈武節度使。

① [校] 嗣恭：原作“思恭”，據《舊唐書》卷一二二、《新唐書》卷一三八《路嗣恭傳》改。下同。

② [校] 牛仙客：原作“牛仙容”，據《舊唐書》卷一〇三《牛仙客傳》改。

五代

張希崇，唐靈武節度使。

馮暉，晉靈武節度使。

王殷，晉原州刺史。

宋

段思恭，知靈州事。

王彥昇，原州防禦使。

安守忠，知靈州。

侯贊，知靈州。

郭密，靈州兵馬都部署。

曹璨，知靈州，徙河西鈐轄。

李繼隆，靈環十州都部署。

王昭遠，靈州路都部署。

楊瓊，靈慶路副都部署。

田紹斌，環慶靈州清遠軍部署。

陳興，涇原儀渭鎮戍軍都部署。

張凝，邠寧環慶靈州安撫使。

潘羅支，朔方節度使。

張齊賢，涇原路安撫經略使。

李繼和，知鎮戍軍，兼原渭儀都巡檢。

廝鐸督，朔方節度使。

孫繼鄴，涇原路副都總管，兼知渭州。

程戡，知渭州。

王堯臣，涇原安撫使。

尹洙，知渭州，兼領涇原路經略公事。

狄青，涇原路經略招討副使。

劉滄，渭州瓦亭砦都監。

桑懌，涇原路兵馬都監。

武英，涇原行營都監。

王珪，涇原路都監。

葛懷敏，涇原路總管。

張亢，涇原路總管，知渭州。

呂公弼，知渭州。

王素，知渭州。

王沿，涇原路經略安撫招討使。

楊文廣，知涇州、鎮戎軍。

劉兼濟，涇原路鈐轄，知原州。

趙滋，鎮戎軍西路都巡檢。

范祥，轉運副使權領古渭州。

种古，涇原路都監，知原州。

郭達，宣撫使，判渭州。

和斌，涇原路鈐轄。

蔡挺，知渭州。

周永清，渭州鈐轄。

孫覽，知渭州。

蔡延慶，知渭州。

王光祖，涇原副總管。

盧秉，知渭州。

姚麟，涇原副總管。

張整，涇原環慶鈐轄。

劉庠，知渭州。

劉舜卿，知渭州。

劉昌祚，知渭州。

章粦，知渭州。

呂大忠，知渭州。

王文振，涇原都鈐轄。

劉豎，涇原兵馬都監，知德順軍。

郭成，涇原鈐轄。

劉錡，涇原經略使，兼知渭州。

曲端，涇原路經略安撫使。

朱友恭，涇原第一副將。

郭浩，涇原路兵馬鈐轄，知涇州。

李嘉，知彭陽縣。

元

韓扎篴，^①中興路管民官。

朵兒赤，中興路新民總管。

袁裕，西路中興等路新民安撫使。

張文謙，中書左丞，行省西夏中興等路。

董文用，中興等路行省郎中。

郭守敬，從行省西夏提舉河渠。

明

總督

項忠，浙江嘉興人，正統間任。

馬文升，河南鈞州人，景泰間任。^②

王越，直隸潞縣人，弘治間任。

秦紘，山東單縣人。

楊一清，雲南安寧人。

俱弘治間任。

才寬，直隸遷安人，正德間任。

張泰，直隸肅寧人。

鄧璋，順天涿州人。

彭澤，蘭州人。

俱正德間任。

李越，河南祥符人，嘉靖間任。

王憲，山東東平人。

王瓊，山西太原人。

唐龍，浙江蘭谿人。

姚鏌，浙江餘姚人。

劉天和，湖廣麻城人。

楊守禮，山西蒲州人。

張珩，山西石州人。

曾銑，南直江都人。

① [校] 韓扎篴：原作“韓扎篴”，據《元史》卷一三四《朵兒赤傳》改。

② [校] 鈞州人景泰間任：“鈞州”、“景泰”四字，刻本原爲墨丁，據四庫本《乾隆甘肅志》補。